



**АКАФИСТ ПРЕСВЯТОЙ БОГОРОДИЦЕ В ЧЕСТЬ
ИКОНЫ ЕЕ «ИВЕРСКАЯ»**

Кондак 1

Взбранной Воеводе, Владычице нашей Богородице,/ похвальная пения приносим Ти рабц Твои,/ яко пришествием честнаго образа Твоего стяжавшии щит крепкий, стену неборимую и стража неусыпна./ Ты же, яко имущая державу непобедимую,/ покрый и защити нас, Владычице, от всех врагов видимых и невидимых/ и избави от всякаго вреда, душевнаго и телеснаго, да зовем Ти://

Радуйся, благая Вратарнице, двери райския верным отверзающая.

Икос 1

Ангел предстатель послан бысть рещи Богородице, егда паде Ей жребий апостольскаго служения в земли Иверстей: «Не разлучайся Иерусалима, жребий же, Тебе падший, просветится в последния дни, Ты же имаши потрудитися в земли, юже Тебе Бог изволит».

Темже радуйся, Еюже Евангелие благовестится;

радуйся, Еюже идольская прелесть упразднится.

Радуйся, Еюже власть князя тьмы разрушится;

радуйся, Еюже Царство Христово утвердится.

Радуйся, падших во тьму идолослужения к свету Евангелия воззвание;

радуйся, от рабства диаволу в свободу славы чад Божиих приведение.

Радуйся, готовая служительнице Сына Своего и Бога;

радуйся, послушанием преслушание Евы исцеляющая.

Радуйся, высоту добродетелей;

радуйся, глубино смиренномудрия.

Радуйся, Еюже невернии познают Творца;

радуйся, Еюже вернии усыновляются **О**тцу.

Радуйся, благая Вратарнице,/ двери райския верным отверзающая.

Кондак 2

Видящи Святая Дева дивное и новое о Себе промышление Божие, яко раба Господня, присно готовая творити волю Его, возопи: Аллилуиа.

Икос 2

Разум недоразумеваемый глагола ангельскаго разумен Тебе, Пречистая, творя Господь, управи шествие Твое к Горе Афонстей, идеже проповедася Тобою Евангелие, и тако явися жребий Твой. Мы же радостно вопием:

Радуйся, освятившая Афон Своим пришествием;

радуйся, низложившая тамо идолов.

Радуйся, насадившая тамо веру истинную;

радуйся, неверие отгнавшая.

АКАФИСТ ПРЕСВЯТОЙ БОГОРОДИЦЕ В ЧЕСТЬ ИКОНЫ ЕЕ «ИВЕРСКАЯ»

Радуйся, в жребий Себе Гору сию избравшая;
радуйся, благодать сему месту обещающая.
Радуйся, верным, живущим в ней, подательнице земных благ;
радуйся, споручнице вечного их спасения.
Радуйся, теплая ходатаице о живущих в жребию Твоею;
радуйся, всех врагов их устрашение.
Радуйся, милость Сына Своего до скончания века месту сему обещающая;
радуйся, благодать Его неотступною быти предвещающая.
Радуйся, благая Вратарнице,/ двери райския верным отверзающая.

Кондак 3

Сила Вышняго заступлением Богоматере осени Святую Гору и удолия и дебри ея, яко село пространное показа всем, в иночестей жизни хотящим жати спасение, вегда пети сице: Аллилуиа.

Икос 3

Имущи промышление о жребию Своею, людех Иверския земли, устроила еси в месте, идеже Сама к Афону пристала еси, обитель роду их, в тихое пристанище ищущим спасения, хотящи даровати ей в щит и ограждение икону Свою, да вси взывают:

Радуйся, пославшая проповедницу Евангелия в землю Иверскую;
радуйся, обратившая сию страну от прелести идольстей к свету Христову.
Радуйся, Отрасли неувядаемая розго, дивную лозу Нине даровавшая;
радуйся, от нея произрастившая гроздие чудес и благия веры.
Радуйся, сад духовный на Афоне насадившая;
радуйся, струю от него просвещения духовнаго стране Иверстей источившая.
Радуйся, Евфимия златословесная уста;
радуйся, Горникия непобедимая крепосте.
Радуйся, всех благочестивых укрепление;
радуйся, иноков ограждение.
Радуйся, тихое пристанище ищущих спасение;
радуйся, вечный покой им уготовляющая.
Радуйся, благая Вратарнице,/ двери райския верным отверзающая.

Кондак 4

Бурю внутрь имущи помышлений сумнительных, честная вдовица, яже в Никеи, смятеся, зрящи копием воина-иконоборца прободену святую и чтимую икону Богоматере и абие источившу кровь и, страхом обдержима, да не поругана будет святая икона, с молитвою слезоточащи вверже ю в море.

Увидевши же ю прямо верху воды путь творящу и текущу к западу, возопи с веселием: Аллилуиа.

Икос 4

Видеша иноцы Святыя Горы явльшийся в мори яко пламень, яко столп огнен, егоже верх досязаше небеси, яко солнце сияющее, и в нощи притекоша к краю моря и, видевше святую икону Богоматере, по морю носимую силою свыше, возопиша Благодатней:

Радуйся, Купино, Законоположником предзримая;
радуйся, столпе огненный, наставляяй сущия во тьме.
Радуйся, лестнице, досягающая до Небес, еюже сниде Бог;
радуйся, мосте, преводяй сущих от земли на Небо.
Радуйся, заре таинственного дне;
радуйся, Звездо, являющая Солнце.
Радуйся, Свет Неизреченный родившая;
радуйся, еже како ни одинаго же научившая.
Радуйся, облеченная в солнце, сияющая благодатию и славою всей вселенной;
радуйся, молние, души просвещающая и верных смыслы озаряющая.
Радуйся, светлосте, во тьме светящая;
радуйся, яко многосветлое возсияваеши просвещение.
Радуйся, благая Вратарнице,/ двери райския верным отверзающая.

Кондак 5

Боготечную икону Свою дати хотящи Иверстей обители, рекла еси, Богомати, преподобному Гавриилу: «Иди с ликом иноков к берегу моря, сниде в пучину и прими икону Мою». Он же, верою и любовию окриляемь, по воде, аки по суху, ходя, прият ю во объятия своя и, достиг сокровища, иным недостижимаго, в достояние иноков рода своего иверскаго, веселяся, пояше: Аллилуиа.

Икос 5

Видеша иноцы иверстии многожды икону Богоматере из храма верху врат монастырских на стену града незримою силою изнесенную, ужасався и стояху, зовуще к Ней таковая:

Радуйся, святую икону дати нам изволившая;
радуйся, покров ю быти нам обещавшая.
Радуйся, любовь Твою к обители нашей показавшая;
радуйся, благое о ней промышление явившая.
Радуйся, помощь наша в чуждей стране;
радуйся, в странствии нашем утешение.

АКАФИСТ ПРЕСВЯТОЙ БОГОРОДИЦЕ В ЧЕСТЬ ИКОНЫ ЕЕ «ИВЕРСКАЯ»

Радуйся, Божие к нам благоволение;
радуйся, наше к Богу дерзновеление.
Радуйся, слез наших избавлеление;
радуйся, сирых нас защитнице.
Радуйся, ограждение наше;
радуйся, едина радости наша.
Радуйся, благая Вратарнице,/ двери райския верным отверзающая.

Кондак 6

Проповедника творящи Гавриила воли Своя, рекла еси нему, Владычице: «Не приидох хранима быти от вас, но да буду Аз хранительница ваша не токмо в настоящем, но и в будущем веце. Се даю вам знамение: дондеже зрите в монастыре икону Мою, не оскудеет вам благодать Сына Моего и милость, да вопиют Ему вси: Аллилуиа».

Икос 6

Возсия радость велия слышавшим Твоя, Богомати, обетования, и Тебе, Небесней Вратарнице, храм во вратах обители с веселием иноцы воздвигоша и возопиша тако:

Радуйся, хранительнице наша в настоящем веце;
радуйся, предстательнице наша в будущем.
Радуйся, страху Божию нас научающая;
радуйся, на путь добродетели наставляющая.
Радуйся, дерзновение наша и надеждо;
радуйся, упование наше и покров.
Радуйся, благоутробие Сына Своего к нам преклонившая;
радуйся, благодать Его неоскудно пребывати с нами возвещающая.
Радуйся, святую икону залогом милости давшая;
радуйся, дар чудодействия ей даровавшая.
Радуйся, прилог всякаго зла от обители отражающая;
радуйся, всему благому вход отверзающая.
Радуйся, благая Вратарнице,/ двери райския верным отверзающая.

Кондак 7

Хотящу иногда злочестивому Амуре обитель Иверскую разорити и стадо иноков, тамо собранное разсеяти, скоро позна крепкое обители заступление от Богоматере, увидев корабли своя в пучине моря погрязшия и ратники изгибшия. И пришед со смирением, серебро и злато в обитель даяше, молитвы прося. Иноцы же, видевше сия, возопиша к Богу: Аллилуиа.

Икос 7

Новыя и безчисленные чудеса показа Богомати, в обители оскудение вина, муки и ела восполняючи, бесныя исцеляючи, хромым хождение даруючи, слепым прозрение и всяк недуг врачующи, да, видяще чудеса сия, воспевают Тебе:

Радуйся, взбранная Воеводо, враги побеждающая;
радуйся, скорая на помощь призывающим Тя.
Радуйся, не презирающая моления нашего;
радуйся, обещания Своего не отступяющая.
Радуйся, скорбь обители в радость претворяющая;
радуйся, оскудение обители восполняющая.
Радуйся, слепых прозрение;
радуйся, хромых хождение.
Радуйся, всех немощных целительница;
радуйся, всех скорбных утешительница.
Радуйся, яко не престаеши промысляючи и спасающи нас;
радуйся, яко от толиких бед избавляеши нас.
Радуйся, благая Вратарнице,/ двери райския верным отверзяющая.

Кондак 8

Странно покрываемую от иконы Богоматере обитель Иверскую слышав Патриарх Никон, вожделе и Российстей стране благодати Ея стяжати причастие; сего ради, создав обитель в честь славного образа, со тщанием испроси изображение чудотворного образа Богоматере, да, покровом Ея защищаеми, вопиют Богу: Аллилуиа.

Икос 8

Вся сущи в Вышних, но и нижних не отступаючи, благоизволила еси, Богомати, якоже древле преподобному Антонию даровася благословение Горы Афонския на утверждение обители Печерския, даровати и новой обители в стране Российстей благодать Свою, еюже благословила еси Афон, в подобии честного образа Твоего. Темже взываем Ти:

Радуйся, страны Российския покрове, ширший облака;
радуйся, православныя веры в ней ограждение и утверждение.
Радуйся, Православныя Церкви непоколебимый столпе;
радуйся, ересей и расколов обличение.
Радуйся, светлыми лучами чудотворных икон всю страну озаряющая;
радуйся, дары исцелений и милостей от них источяющая.
Радуйся, врагов устрашение;
радуйся, святителей веселие.

АКАФИСТ ПРЕСВЯТОЙ БОГОРОДИЦЕ В ЧЕСТЬ ИКОНЫ ЕЕ «ИВЕРСКАЯ»

Радуйся, иер^рев похва^ло;
радуйся, иноков наст^авнице.
Радуйся, всего рода нашего спас^ение;
радуйся, верных утвержд^ение.
Радуйся, благая Врат^арнице,/ двери райския верным отверз^ающая.

Кондак 9

Всяко тщание имуще о написании честнаго образа милостивыя Вратарницы, сонм постников иверских молебная пения совершает, водою от чудныя иконы омывает дску, на нейже имать изобразитися честный образ, и преподобнаго Иамвлиха освящает, иже, подвизався в посте, молитве и бдении со всею братиею, списа вапы, святою водою и мощами освященными, честное изображение Богоматере, выну моляся и вопия Богу: Аллилуиа.

Икос 9

Вития многовещанная, яко рыбы безгласная, видим о Тебе, Богородице: недоумеют бо, како по достоинству похвалити вся чудеса Твоя, явленная роду нашему от святыя Твоея иконы, еще бо на пути в Российскую страну сия чудодествоваше, благочестивому Мануилу повелевая выкуп дати неверным, возбраняющим шествие святыя иконы в страну Русскую, и сугубо ему послежде отдавши. Мы же, дивящися, верно вопием Ти:

Радуйся, источниче чудес неисчерп^аемый;
радуйся, всякия милости под^ательнице.
Радуйся, всегда теплая о нас ходатаице к Бо^гу;
радуйся, промышления Его о нас сокровище.
Радуйся, сущим в бедах приб^ежище;
радуйся, скорбящих утеш^ение.
Радуйся, больных исцел^ение;
радуйся, немощных укрепле^ние.
Радуйся, вдов заступле^ние;
радуйся, сиротствующих милосердая Ма^ти.
Радуйся, заблуждающих на путь истины обраще^ние;
радуйся, грешников к покаянию воззв^ание.
Радуйся, благая Врат^арнице,/ двери райския верным отверз^ающая.

Кондак 10

Спасти хотящи многия люди от бед и скорбей, источаеши, Богомати, неоскудный источник милости от Своея иконы роду нашему: се бо и в стольном граде Москве благая Вратарница являешися всем поклоняющимся Тебе, скорое вспоможение подавающи, и в новой обители Иверстей благодати струи от иконы Твоея испущаеши, и во иных градах, обителех и всех чтущим

Тя полезное прошение исполняющи. Темже, прославляя Бога, давшаго нам благодать таковую, вопием Ему: Аллилуиа.

Икос 10

Стена еси иноческому чину, Богородице, и всем, к Тебе прибегающим, ибо Небесе и земли Творец, вселься в девственной утробе Твоей, научи всех чистоты и целомудрия ревнителей возглашати Тебе:

Радуйся, девства сосуде избранный;
радуйся, чистейший образе целомудрия.
Радуйся, чертоже безсеменнаго уневещения;
радуйся, Невесто невестная.
Радуйся, Сеятеля чистоты рождающая;
радуйся, верных Господеви сочетавшая.
Радуйся, в буре искушений скорая помощнице;
радуйся, прилоги врага отражающая.
Радуйся, мглу душевредных страстей отгоняющая;
радуйся, помыслы очищающая.
Радуйся, земныя сласти презирати научающая;
радуйся, к горнему умы и сердца направляющая.
Радуйся, благая Вратарнице, / двери райския верным отверзающая.

Кондак 11

Пение всякое побеждается, спростретися тщащееся ко множеству многих щедрот Твоих; равночисленные бо песка песни аще приносим Ти, Владычице наша Богородице, ничтоже совершаем достойно, яже подаваеши нам, о Тебе вопиющим: Аллилуиа.

Икос 11

Светоприемную свещу, сущим во тьме бед являющуюся, зрим святую икону Богоматере; невестественный бо огонь благодати приемлющи, лучами чудес всех озаряет, научающи сие взывати Благословенней:

Радуйся, во всяких нуждах скорое вспоможение;
радуйся, в печалех быстрое услышание.
Радуйся, от огня, меча и нашествия иноплеменных нас избавляющая;
радуйся, от глада и напрасныя смерти нас свободяющая.
Радуйся, от язвы и всегубительства смертнаго нас соблюдающая;
радуйся, бедствующим в пути, на суше и на водах внезапное вспоможение.
Радуйся, язв душевных и телесных врачевание;
радуйся, оставленных врачами в Своей руке приемлющая.

АКАФИСТ ПРЕСВЯТОЙ БОГОРОДИЦЕ В ЧЕСТЬ ИКОНЫ ЕЕ «ИВЕРСКАЯ»

Радуйся, милосердая утешительнице всех скорбящих и обремененных;
радуйся, не отвергающая всех презренных и отверженных.

Радуйся, самых отчаянных из рова погибели исхищающая;
радуйся, и мене, обнаженного добрых дел, не оставляющая Своим покровом и заступлением.

Радуйся, благая Вратарнице,/ двери райския верным отверзающая.

Кондак 12

Благодати дати восхотев, долгов древних, всех долгов Решитель человеком, прииде Собою ко отшедшим Того благодати и, раздрав рукописание, дарова нам крепкое Богоблагодатныя ходатайство, да вопием вси молитвами Ея: Аллилуиа.

Икос 12

Поюще Твоя чудеса, являемая нам в жизни сей, хвалим Тя, Богородице, яко милости источник неисчерпаемый. Но, припадающе к Тебе пред чудотворною иконою Твоею, молим Тя смиренно: буди нам покров и защищение и в день кончины нашея, и егда имамы предстати на суд страшному престолу Сына Твоего, да вопием Ти:

Радуйся, во славе приседаящая престолу Сына Твоего и тамо нас воспоминающая;

радуйся, с Сыном Твоим и Богом вечно царствующая и о нас ходатайствующая.

Радуйся, уповающим на Тя конец живота непостыден дарующая;

радуйся, безболезненную и мирную кончину устраивающая.

Радуйся, мытарств горьких избавление;

радуйся, от власти князя воздушнаго освобождение.

Радуйся, грехов наших непоминовение;

радуйся, по Господе упование нам блаженныя жизни.

Радуйся, уповающим на Тя одесную Сына Твоего стояние устраивающая;

радуйся, блаженнаго гласа Онаго, Небеснаго Царствия наследие обещающего, слышати сподобляющая.

Радуйся, благая Мати, всех, чтущих Тя, жити с Собою вселяющая;

радуйся, крепкая надеждо вечнаго спасения всем христианом.

Радуйся, благая Вратарнице,/ двери райския верным отверзающая.

Кондак 13

О Всепетая Мати, Пресвятая Госпоже Дево Богородице! Призри на нас, приносящих смиренно со слезами малыя сия молитвы пред пречистым Твоим образом и все упование и надежду возложивших на Тя, и избави нас всех бед и напастей в животе сем и будущия изми муки, да, спасаемии Тобою, вопием выну: Аллилуиа.

Этот кондак читается трижды, затем 1-й икос «Ангел предстатель...» и 1-й кондак «Взбранной Воеводе...».

Молитва

О Пресвятая Дево, Мати Господа, Царице Небесе и земли! Вонми многоболезненному воздыханию душ наших, призри с высоты святя Твоея на нас, с верою и любовью поклоняющихся пречистому образу Твоему. Се бо, грехми погружаемии и скорбьми обуреваемии, взирающе на Твой образ, яко живей Ти сущей с нами, приносим смиренная моления наша. Не имамы бо ни иныя помощи, ни инаго предстательства, ни утешения, токмо Тебе, о Мати всех скорбящих и обремененных! Помози нам немощным, утоли скорбь нашу, настави на путь правый нас, заблуждающих, уврачуй и спаси безнадежных, даруй нам прочее время живота нашего в мире и тишине проводить, подаждь христианскую кончину и на Страшнем Суде Сына Твоего явися нам милосердая заступница, да всегда поем, величаем и славим Тя, яко благую заступницу рода христианскаго, со всеми угодившими Богу. Аминь.

Ин кондак, глас 4

Совозсия днесь свету Воскресения свет чистыя иконы Твоея; обоя весело торжествующе, вопием: сохрани раб Твоих благодатию, Владычице.